

Odluka kojom se donosi Zakon o izmjenama i dopunama Zakona o tužilaštvima Republike Srpske

Koristeći se ovlaštenjima koja su mi data članom V Aneksa 10 (Sporazum o civilnoj implementaciji Mirovnog ugovora) Općeg okvirnog sporazuma za mir u Bosni i Hercegovini, prema kojem je visoki predstavnik konačni autoritet u zemlji u pogledu tumačenja pomenutog Sporazuma o civilnoj implementaciji Mirovnog ugovora; i posebno uzevši u obzir član II. 1. (d) gore navedenog Sporazuma, prema kojem visoki predstavnik “pruža pomoć, kada to ocijeni neophodnim, u iznalaženju rješenja za sve probleme koji se pojave u vezi sa civilnom implementacijom”;

Pozivajući se na stav XI. 2. Zaključaka Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru visokog predstavnika da iskoristi svoj konačni autoritet u zemlji u pogledu tumačenja Sporazuma o civilnoj implementaciji Mirovnog ugovora kako bi pomogao u iznalaženju rješenja za probleme, kako je prethodno rečeno, “donošenjem obavezujućih odluka, kada to bude smatrao neophodnim”, u vezi sa određenim pitanjima, uključujući (u skladu sa tačkom (c) ovog stava) i “mjere u svrhu osiguranja implementacije Mirovnog sporazuma na čitavoj teritoriji Bosne i Hercegovine i njenih entiteta”;

Uvjeran u vitalni značaj koji za Bosnu i Hercegovinu ima nastojanje da se ojača i slijedi vladavina zakona kako bi se stvorila osnova za privredni rast i strane investicije;

Imajući u vidu Komunique Upravnog odbora Vijeća za

implementaciju mira od 2. i 3. decembra 2004. godine u kojem je Upravni odbor izrazio svoju punu podršku radu domaćih i međunarodnih sudija i tužilaca u Bosni i Hercegovini, i naglašavajući da efikasno provođenje pravde, kao jedan od ključnih osnova poslijeratnog oporavka Bosne i Hercegovine, zavisi od funkcionalnog i adekvatno nagrađenog pravosuđa;

Uzimajući u obzir da Upravni odbor “potpuno podržava hitnu potrebu za revizijom plata u pravosuđu kako bi se osigurala odgovarajuća raspodjela sredstava, te omogućio efikasan rad pravosudnog sistema”;

Uočavajući potrebu da se zaustavi dalje povećanje plata za tužioce do stupanja na snagu novog zakona kojim će se regulisati ove plate,

Uzevši u obzir i razmotrivši sve navedeno, donosim sljedeću

ODLUKU

kojom se donosi Zakon o izmjenama i dopunama Zakona o tužilaštvima Republike Srpske

(“Službeni glasnik Republike Srpske”, br. 55/02 i 85/03)

koji se nalazi u prilogu Odluke i čini njen sastavni dio.

Ovaj zakon se objavljuje na službenoj web-stranici Ureda visokog predstavnika i stupa na snagu odmah kao zakon Republike Srpske, na privremenoj osnovi, sve dok ga Narodna skupština Republike Srpske ne usvoji u odgovarajućem obliku, bez izmjena i dopuna i bez dodatnih uvjeta. Ova odluka stupa na snagu odmah i objavljuje se bez odlaganja u “Službenom glasniku Republike Srpske”.

Sarajevo , 13. decembar 2004.

**ZAKON O IZMJENAMA I DOPUNAMA ZAKONA O TUŽILAŠTVIMA REPUBLIKE
SRPSKE**

Član 1.

U Zakonu o tužilaštvima Republike Srpske ("Službeni glasnik Republike Srpske", br. 55/02 i 85/03), član 42. se mijenja kako slijedi:

"Osnovna stopa za izračunavanje plate glavnog tužioca, zamjenika glavnog tužioca i tužilaca je jednaka iznosu tri prosječne neto plate zaposlenika u Republici Srpskoj za mjesec novembar 2004. godine."

Član 2.

Ovaj zakon stupa na snagu odmah i odmah se objavljuje.